

1.Maj 2016

Allattoq: Else Jonna Villadsen SIP Ilulissani siulittaasoq.

Siullermik piumaffigilaassavassi tamassi nikuilaaqqullusi peqatigiiffiup katinggataata siaarneqarnerani.

Asasakka sulisartoqatika maanilu isersimasut najuuttusi tamassi. Kingumunaasit maani katersuuppugut nunarsuarmioqatigiit sulisartunut ullorititaat nalliussillugu malunnartitsiniarluta.

Piffissaq manna tikissimavarput sulisartuunermi atukkatta nalimmassaavigineqarnissaanut sorsuuteqassalluta anguniagaqaraannimi sorsugassaqararaaq soorlu taallortorsuatta ilaat taama taalliorsimasoq.

Sulisartuunermi maannakkut atukkat suliffeqarfiit akissaasersuinerat eqqarsaatigissagaanni tapinik isumaqatigiissutit malillugit piniarnermi assorujussuaq akimmisaartitsisoqartarmat soorlu kommunep atugassarititaat eqqarsaatigalugit, pisinnaatitaaffinnik ataqqinninneruguni aammalu sulianik sukkannerusumik akissuteqaateqartarsinnaaguni suliffittut orniginarnerussagalarpoq.

Paasissutissat kinguliit malillugit Ilulissani suliffissaaleqisut siornamut naleqqiullugu ikileriarsimapput, tamatumalu malitsigisaanik Peqatigiiffimmut ilaasortat aamma amerleriagaatsiarsimallutik. Sulili suliffissaaleqisut appariaateqarnerusinnaapput atugassarititaasut pitnaanerusuuppata.

Nunaqavissunik sulisoqarnek suli pitsaanagerusinnaappat suliffissaaleqisut ikinnerussagalarput, nunatsinni malunnaateqarnerpaamik takornariaqarfiusugut takornarissat tikerarnerpaaffianni suliffissaaleqisunik atorluaanerunissaq aqqissuulluakkamik aammalu naleqqussaaqqittoqarneratigut sulisinnaassunik suli pilersitsiffiusinnaagaluarmat, sulisussarsiornermi takornarissanut tunngatillugu maluginiarneqartarmat piumasaqaatit qaffasippallaartut naak ilaatigut eqqiaanermi aamma igasuunermi allatigullu angallassinikkut allaat allagartaqartunik suliffissaaleqisunik pisinnaalluortoqaraluartoq, naleqqussaasoqarsinnaappat suli pitsaanagerusumik aningaasat piffimmi kaaviiartinneqarnerussagaluarmata annissorneqaratik.

Pisiniarfiit qiviaraanni nunatsinni niuerneramik ilinniarfeqarluarluta amerlavallaat tikisitat suli atorneqartut nunaqavissunik salliutitsinermik oqartoqarsinnaanerpa?

Qaasuitsup kommuneanut; sulisartut ornigaasi Naalakkersuisut aamma SIK-p illuatungeriillutik atiugaat atorlugit sulisitsisuugassi, eqqaamassuarsilu isumaqatigiissutini taakkunani atsiorneqarsimasut allanngortissinnaannginnassigit, tullissaanimut isumaqatigiinniartoqalersinnagu allanillu taarsingippata, akimmisaartaqaasi tapinik assigisaannillu pissarsiortoqartilluta sipaarniarnerup aqqani isumaqatigiissutit imaaliallaannarlugit allanngortinneqarsinnaanngillat.

SIK pisortallu isumaqatigiissutaat atorlugit sulisartut akunnermusiallit aammalu qaammammusiallit ilinniagallit ilinniagaqanngitsullu taakkununngalu assigusunik isumaqatigiissutit atorlugit sulisartut aningaasarsiaat qaffasinnerpaajunngillat qinikkammi aningaasarsiannut qaffasissunut taakkuupput annertuumik aningaasarsiaqartitsisut isertitat akileraarusernerisigut aammalu taakkuupput imminnut qularnaveeqqusersimasut assuarliuteqarsinnaanerminnut sullinneqarsinnaanerminnik taakkuuppullu tapinik ujartuisartut allaat allanit annikigineqarsinnaasunik, inuuniarnermi ullumikkut akisoqaaq aningaasarsiat malinnaatinneqassappata inuussutigineqarsinnaanerannut malinnaatinneqartariaqarput.

Tusartuarparput peqqinnarnerusumik inuuneqalissasugut nioqqutissat akii qiviarutsigit aammalu inuuniarnermi akigititat allat inuussutigineqarsinnaanerat suli naleqqussarneqarnerusinnaavoq.

Sanaartorneq annertuumik ingerlanneqarpoq sulilu aamma siunissami illoqarfimmut sanaartornikkut pilersaarutit annertupput tassani annermik namminersortut sulisitsisuullutik, illoqarfik annertuumik sanaartorfiutillugu naattorsuutiginarpoq suli suliffissarsiortut appariartorsinnaanerat, ataqatigiissaalluakkamimmi siunertaqartoqartillugu aamma pisinnaatitaaffiit atugassarititaasullu malinneqartillugit neriulluarnartoqarpoq.

Pinngitsoorusunngilanga suliffeqarfinnut taakkualu pisortaannut suleqatiserinnissallunga, pinngittoorsinnaannginnassigit sulisut aalajaatsut sulerusussuseqartut aammalu piorsarsimassutsikkut ineriartornermi inuttut

suliallu eqqarsaatigalugit siuarsaatigissallugit, sulisut sinniisaat suliffeqarfiit tamat pisariaqartitaat, qaninnerpaamik sulisitsisunut ataveqartut akimmiffinnik naaperiaasinnaasut pilersinneqarnissaanut ikorfartoqatigiinnissamut siuarsaaqataassallunga, suleqatiginnissusermik peqatiseraassi, akissussaassusermik kivitseqatigeqqulluta.

Ullumikkut ilaasortat piumavaat.

- Suliffiit ataavartut
- Pikkorissarnerit
- Tapit isumaqatigiissut malillugu atorveqartut.
- Sulisitsisut naligiimmik sulisorisanut ataqqinnittut.

Kaammattuutigerusunnarpoq sulisartunit isumaqatigiissutit malillugit pisinnaatitaaffiit eqqumaffigilluarneqassasut qularnartoqarsinnaavormi.

SIK-p nutaamik aqqissuussaanerata kinguneraa suliat nutaarluinnaat toqqaannaq sulisut sinniisuanniit tigusalneri, taamaalilluni peqatigiiffiup sulisut sinniisuisa isumaqatigiissutaat malillugu suliffeqarfinni assigiinngitsuni sinniisoqartitsilernissaq aqcutissiuqataaffigissammagu suliffeqarfiillu amerlasuut tikiqqareeraluartut amerlapput suli sulisut sinniisoqanngitsut, sinniisoqanngitsummi taakkuukkajupput suleqatigiinnerup iluani aaqqiissutissanik naaperiaasinnaanermi periarfissaqarpiangitsut toqqaannarlu peqatigiiffik aqcutigalugu suliamik aallartitsiffiusartut, sinniisunut isumaqatigiissut malillugu sulisut tallimanik amerlaneruppata sulisut sinniisoqartussaagaluarimat.

Naggataatigut kissaatigissavara tamatta assakkut tigulluta nikueriarluta sulisartut ullorititaat pillugu hurraarutigisariaqaripput

Tamassi sulisartut ulluanni pilluangaaritsi.